



KENYATAAN MEDIA MENTERI KANAN PERTAHANAN

24 MEI 2021

MENGENAI PERINTAH KAWALAN PERGERAKAN (PKP)

DALAM usaha menghadapi fenomena penularan baharu pandemik COVID-19 yang kian membimbangkan, kerajaan amat serius melaksanakan amanah dan terus menerus memberi tumpuan ke arah meningkatkan kawalan keselamatan melibatkan semua aspek. Ini kerana keselamatan adalah perkara utama yang tidak boleh dikompromi walau apa-apa juga keadaan.

Peningkatan kawalan keselamatan ini termasuklah penguatkuasaan di sempadan negara bagi mengelakkan kemasukan Pendatang Asing Tanpa Izin (PATI) ke negara ini.

Dengan menguatkuasakan PKP di seluruh negara, semua pasukan keselamatan telah memperkemas operasi bersepadu bagi memperketat kawalan sempadan daripada dicerobohi oleh anasir-anasir asing.

Sememangnya kawalan sempadan akan menjadi antara fokus kerajaan melalui transformasi pengurusan dan tadbir urus termasuk menggunakan peralatan yang berteknologi tinggi dan berbeza mengikut kesesuaian bentuk muka bumi di sempadan.

Ini termasuklah penambahan pos-pos kawalan, pagar sempadan, CCTV, radar dan dron yang berkapasiti tinggi.

Dimaklumkan bahawa pada ketika ini, semua pasukan keselamatan yang terdiri daripada Polis Diraja Malaysia (PDRM), Angkatan Tentera Malaysia (ATM), Agensi Penguatkuasa Maritim Malaysia (APMM), Agensi Kawalan Sempadan Malaysia (AKSEM) dan RELA giat melakukan rondaan dan kawalan di seluruh negara dengan tujuan utama adalah keselamatan dan kesihatan rakyat terjamin.

Langkah proaktif dibuat berasaskan kepada fakta dan maklumat terkini, malah sejak 18 Mei 2021, seramai 9,629 anggota keselamatan telah ditugaskan untuk melakukan rondaan, penguatkuasaan dan sekatan jalan raya di seluruh negara. Daripada jumlah itu, 5,460 adalah anggota PDRM, manakala selebihnya, 4,169 pula melibatkan ATM, RELA, APM dan lain-lain agensi.

Tindakan keselamatan dan kawalan dilakukan menerusi Sekatan Jalan Raya (SJR), OP BENTENG dan SJR bagi kawasan yang dilaksanakan Perintah Kawalan Pergerakan Diperketatkan (PKPD).

Sebelum ini, kerajaan juga telah membuat keputusan menyekat kemasukan sementara pengembara dari India, Sri Lanka, Nepal, Bangladesh dan Pakistan kerana bimbang jangkitan varian baharu dari negara itu akan menular ke negara ini dan tindakan ini dibuat dengan tegas melibatkan semua pihak.

Kerajaan juga telah memperketatkan kemasukan rakyat Malaysia daripada negara-negara tersebut di pintu antarabangsa dengan menambah jumlah kuarantin daripada 14 hari kepada 21 hari.

Kesimpulannya semua frontliners termasuklah para petugas keselamatan telah mengorbankan masa mereka sepenuh masa demi menjaga kesihatan dan kesejahteraan rakyat.

Justeru, saya menyeru semua pihak marilah kita terus membantu meringankan tugas frontliners dengan memberi kerjasama terhadap pematuhan SOP dan meningkatkan kawalan sendiri.

Saya yakin kita akan menang dalam perjuangan ini kerana kita pernah berjaya. Sekarang masanya untuk kita berhenti bertelagah dan fokus kepada perjuangan melawan pandemik COVID-19.

Pelanjutan Tempoh Kuarantin Wajib Bagi Pengembara Yang Tiba Di Malaysia

Mengambil kira situasi COVID-19 di dunia ketika ini apabila lebih daripada 50% negara melaporkan penularan *Variant of Concern* (VOC) dalam komuniti, maka Sidang Khas MKN hari ini bersetuju untuk memperketatkan SOP Pelanjutan Tempoh Kuarantin Wajib ke atas Pengembara yang tiba di Malaysia seperti berikut:

- Semua pengembara perlu menjalani ujian pengesanan RT-PCR COVID-19 tiga (3) hari sebelum berlepas dan hanya keputusan ujian negatif boleh menaiki penerbangan untuk masuk ke Malaysia.
- Semua pengembara perlu menjalani ujian pengesanan RT-PCR COVID-19 semasa ketibaan di Pintu Masuk Antarabangsa.
- Tempoh kuarantin wajib ke atas pengembara warganegara Malaysia dan bukan warganegara yang diberi kebenaran masuk ke Malaysia dari Sri Lanka, Bangladesh, Nepal dan Pakistan dilanjutkan daripada 14 hari kepada 21 hari di stesen kuarantin yang ditetapkan oleh Kerajaan. Pelaksanaan arahan kuarantin wajib selama tempoh 21 hari ke atas pengembara warganegara Malaysia dan bukan

warganegara yang diberi kebenaran masuk ke Malaysia yang tiba dari **INDIA ADALAH DIKEKALKAN**.

- Tempoh kuarantin wajib dari **SEMUA NEGARA LAIN** dilanjutkan daripada **10 hari kepada 14 hari** di stesen kuarantin yang ditetapkan oleh Kerajaan. Namun begitu, tempoh kuarantin 14 hari ini akan dilanjutkan selama 7 hari lagi (menjadikan jumlah kuarantin 21 hari) sekiranya terdapat keperluan berdasarkan hasil penilaian risiko yang telah dijalankan pada hari ke-14. Kuarantin tambahan ini akan dilaksanakan di stesen kuarantin yang sama.
- Ujian ulangan RT-PCR COVID-19 dilakukan pada hari ke-10. Sekiranya dilanjutkan tempoh kuarantin sehingga 21 hari, ujian ulangan RT-PCR COVID-19 dibuat pada hari ke-18.

Pelaksanaan ini akan **berkuatkuasa serta merta**.

PKPD Lima (5) Sub-zon dalam Wilayah Persekutuan Labuan

Kementerian Kesihatan Malaysia (KKM) hari ini melaporkan peningkatan kes COVID-19 secara mendadak di Lima (5) Sub-zon dalam Wilayah Persekutuan Labuan.

Berdasarkan kepada situasi semasa peningkatan mendadak kes COVID-19 di WP Labuan adalah susulan daripada peningkatan kes di semua negeri di Malaysia dan kesemua lima (5) sub-zon kini berstatus Jingga dan Merah.

KKM turut mengesahkan kadar kebolehjangkitan bagi WP Labuan pada 23 Mei 2021 adalah 2.55 iaitu melebihi 2.00 yang berkemungkinan akan berlaku jangkitan dengan skala yang lebih besar mungkin berlaku.

Setelah membuat penilaian risiko bersama pelbagai agensi dalam Jawatankuasa Teknikal PKP, Kerajaan bersetuju untuk melaksanakan Perintah Kawalan Pergerakan Diperketatkan (PKPD) di Lima (5) Sub-zon dalam Wilayah Persekutuan Labuan seperti yang dinyatakan bermula dari 26 Mei sehingga 24 Jun 2021.

Pelaksanaan PKPD ini untuk mengawal pergerakan penduduk di kesemua kawasan seterusnya mengekang penularan jangkitan COVID-19 ke komuniti lain.

PKPD 3 Mukim Dalam Daerah Lipis, Pahang

Kementerian Kesihatan Malaysia (KKM) hari ini melaporkan situasi COVID-19 di 3 mukim dalam Daerah Lipis, Pahang iaitu:

- Mukim Kuala Lipis
- Mukim Penjom
- Mukim Budu

Sehingga kini, Mukim Budu mencatatkan 51 kes positif, Mukim Kuala Lipis 24 dan Mukim Penjom 57 menjadikan keseluruhan kes dikesan daripada ketiga-tiga mukim ini adalah sebanyak 132 kes dalam tempoh 24 hari dari 1 Mei hingga 24 Mei 2021 daripada keseluruhan 938 yang disaring.

Setelah membuat penilaian risiko bersama pelbagai agensi dalam Jawatankuasa Teknikal PKP, Kerajaan bersetuju untuk melaksanakan Perintah Kawalan Pergerakan Diperketatkan (PKPD) di 3 Mukim Dalam Daerah Lipis, Pahang iaitu Mukim Kuala Lipis, Mukim Penjom dan Mukim Budu bermula dari 26 Mei 2021 hingga 8 Jun 2021.

Pelaksanaan PKPD ini untuk memudahkan KKM membuat pengesanan awal kes-kes COVID-19 supaya dapat diasingkan secepat mungkin dan seterusnya mengekang penularan jangkitan COVID-19 ke komuniti lain.

PKPD Dua Lokaliti di Putatan, Sabah

Kementerian Kesihatan Malaysia (KKM) hari ini melaporkan situasi COVID-19 di dua (2) lokaliti di Putatan, Sabah iaitu:

- Taman Seri Ketiau
- Taman Desa Seri Ketiau

Sehingga kini, KKM mengesahkan terdapat peningkatan ketara kes dalam tempoh 1 minggu di lokaliti ini apabila sebanyak 21 kes positif direkodkan hasil daripada 282 ujian saringan yang dilaksanakan.

Setelah membuat penilaian risiko bersama pelbagai agensi dalam Jawatankuasa Teknikal PKP, Kerajaan bersetuju untuk melaksanakan Perintah Kawalan Pergerakan Diperketatkan (PKPD) di dua (2) lokaliti di Putatan, Sabah, iaitu Taman Seri Ketiau dan Taman Desa Seri Ketiau bermula dari 26 Mei 2021 hingga 8 Jun 2021.

Pelaksanaan PKPD ini untuk mengawal pergerakan keluar masuk di lokaliti ini seterusnya mengekang penularan jangkitan COVID-19 ke komuniti lain.

PKPD Ladang FELDA Global Ventures (FGV) Kalabakan Selatan, Kalabakan, Sabah

Kementerian Kesihatan Malaysia (KKM) hari ini melaporkan peningkatan kes COVID-19 secara mendadak di Ladang FELDA Global Ventures (FGV) Kalabakan Selatan, Kalabakan, Sabah.

KKM melaporkan sebanyak 9 kes positif telah direkodkan hasil ujian saringan ke atas 47 orang di lokaliti tersebut.

Setelah membuat penilaian risiko bersama pelbagai agensi dalam Jawatankuasa Teknikal PKP, Kerajaan bersetuju untuk melaksanakan Perintah Kawalan Pergerakan Diperketatkan (PKPD) di Ladang FELDA Global Ventures (FGV) Kalabakan Selatan, Kalabakan, Sabah bermula dari 26 Mei 2021 hingga 8 Jun 2021.

Pelaksanaan PKPD ini untuk memudahkan KKM melaksanakan saringan secara bersasar ke atas penduduk yang terlibat dan seterusnya mengekang penularan COVID-19 ke kawasan lain.

PKPD di Kampung Sungai Imam, Tawau, Sabah

Kementerian Kesihatan Malaysia (KKM) hari ini melaporkan situasi COVID-19 di Kampung Sungai Imam, Tawau, Sabah.

KKM mengesahkan terdapat peningkatan ketara kes dalam tempoh 1 minggu di lokaliti ini apabila sebanyak 17 kes positif direkodkan hasil daripada 57 ujian saringan.

Setelah membuat penilaian risiko bersama pelbagai agensi dalam Jawatankuasa Teknikal PKP, Kerajaan bersetuju untuk melaksanakan Perintah Kawalan Pergerakan Diperketatkan (PKPD) di Kampung Sungai Imam, Tawau, Sabah bermula dari 26 Mei 2021 hingga 8 Jun 2021.

Pelaksanaan PKPD ini untuk memudahkan KKM membuat pengesanan awal kes-kes COVID-19 supaya dapat diasingkan secepat mungkin dan seterusnya mengekang penularan jangkitan COVID-19 ke komuniti lain.

SOP bagi kesemua PKPD adalah sama seperti yang diumumkan sebelum ini. Maklumat lanjut boleh diakses di laman sesawang MKN di **www.mkn.gov.my**

Pelanjutan PKPD Felda Kahang Timur, Kluang, Johor

Kerajaan sebelum ini telah melaksanakan Perintah Kawalan Pergerakan Diperketatkan (PKPD) Felda Kahang Timur, Kluang, Johor yang dijadualkan tamat pada 25 Mei 2021.

Sehingga kini, Kementerian Kesihatan Malaysia (KKM) telah melakukan 1,092 ujian saringan dan 140 individu disahkan positif COVID-19 manakala 75 sampel saringan masih menunggu keputusan.

KKM juga mengesahkan penularan masih berlaku di lokaliti tersebut dan kes baharu juga direkodkan.

Setelah membuat penilaian risiko bersama pelbagai agensi dalam Jawatankuasa Teknikal PKP dan atas nasihat KKM, Kerajaan bersetuju melanjutkan PKPD di Felda Kahang Timur, Kluang, Johor sehingga 8 Jun 2021.

Pelanjutan ini juga bagi mengawal pergerakan keluar masuk di lokaliti ini memandangkan penularan kes masih direkodkan selain terdapat sejumlah baki sampel ujian saringan yang menunggu keputusan.

Penamatan PKPD Felda Umas, Kalabakan, Sabah

Kerajaan sebelum ini telah melaksanakan Perintah Kawalan Pergerakan Diperketatkan (PKPD) di Felda Umas, Kalabakan, Sabah yang dijadualkan tamat pada 25 Mei 2021.

Sepanjang tempoh itu, Kementerian Kesihatan Malaysia (KKM) telah melakukan 1,782 ujian saringan dan 183 individu disahkan positif COVID-19.

Sehingga kini, tiada baki sampel menunggu keputusan dan kes positif terakhir yang dilaporkan adalah pada 22 Mei 2021 iaitu satu (1) kes.

KKM juga mengesahkan trend kes menunjukkan penurunan dan kluster adalah terkawal manakala semua kes positif telah diasingkan dan dimasukkan ke PKRC manakala kontak rapat juga diasingkan serta dipantau sehingga hari ke-14.

Setelah membuat penilaian risiko bersama pelbagai agensi dalam Jawatankuasa Teknikal PKP dan atas nasihat KKM, Kerajaan bersetuju menamatkan PKPD di Felda Umas, Kalabakan, Sabah pada 25 Mei 2021 seperti yang dijadualkan.

Penamatan PKPD Kampung Bako Hilir, Kuching, Sarawak

Kerajaan sebelum ini telah melaksanakan Perintah Kawalan Pergerakan Diperketatkan (PKPD) di Kampung Bako Hilir, Kuching, Sarawak yang dijadualkan tamat pada 25 Mei 2021.

Sepanjang tempoh itu, Kementerian Kesihatan Malaysia (KKM) telah melakukan 600 ujian saringan dan seramai 24 individu disahkan positif COVID-19.

Sehingga kini, tiada kes baharu dilaporkan dan kes positif terakhir yang dilaporkan adalah pada 13 Mei 2021 iaitu tiga (3) kes.

KKM juga mengesahkan trend kes menunjukkan penurunan dan kluster adalah terkawal manakala semua kes positif telah diasingkan dan dimasukkan ke PKRC manakala kontak rapat juga diasingkan serta dipantau sehingga hari ke-14.

Setelah membuat penilaian risiko bersama pelbagai agensi dalam Jawatankuasa Teknikal PKP dan atas nasihat KKM, Kerajaan bersetuju menamatkan PKPD di Kampung Bako Hilir, Kuching, Sarawak pada 25 Mei 2021 seperti yang dijadualkan.

Task Force Operasi Pematuhan

Task Force Operasi Pematuhan yang diketuai Polis Diraja Malaysia (PDRM) dengan 3,696 Pasukan Pematuhan melibatkan seramai 16,112 anggota telah melakukan 68,069 pemeriksaan semalam, bagi memantau dan menguatkuasakan pematuhan Prosedur Operasi Standard (SOP) Perintah Kawalan Pergerakan (PKP).

Semalam, 800 individu ditahan atas kesalahan ingkar SOP.

Antara kesalahan direkodkan ialah:

- Tiada penjarakan fizikal (248)
- Gagal merekod butiran diri/daftar masuk premis (219)
- Tidak memakai pelitup muka (133)
- Tidak patuh arahan kawalan pergerakan (61)
- Bawa penumpang berlebihan (13)
- Lain-lain (126)

Kawalan Sempadan Negara

Operasi BENTENG (Op BENTENG) semalam telah menangkap 21 orang Pendatang Asing Tanpa Izin (PATI) dan merampas 12 buah kenderaan darat.

Sebanyak 182 buah bot/kapal turut dikesan di perairan negara melalui lapan (8) aktiviti penglihatan.

Op BENTENG melibatkan Polis Diraja Malaysia (PDRM), Angkatan Tentera Malaysia (ATM), Agensi Penguatkuasaan Maritim Malaysia (APMM) dan Agensi Keselamatan Sempadan Malaysia (AKSEM) serta agensi-agensi keselamatan lain turut menjalankan 504 Sekatan Jalan Raya (SJR) semalam iaitu:

Op PENAWAR/SJR PKP	- 407 SJR
Op BENTENG (PDRM/ATM/RELA)	- 88 SJR
Op BENTENG AKSEM	- 9 SJR

Operasi Sanitasi Awam

Semalam, sebanyak 83 operasi sanitasi dilakukan meliputi 49 zon merah, zon jingga (4), zon kuning (4) dan zon hijau (2) di seluruh negara.

Operasi sanitasi ini melibatkan 474 anggota Jabatan Bomba dan Penyelamat Malaysia (JBPM) dan 218 Pihak Berkuasa Tempatan (PBT) serta 81 buah jentera JBPM.

Secara kumulatifnya, sebanyak 24,562 operasi sanitasi yang merangkumi 156 zon telah dilakukan sejak 30 Mac 2020. Operasi sanitasi melibatkan pusat perniagaan, kawasan perumahan termasuk Projek Perumahan Rakyat (PPR), tempat awam, pasar raya dan bangunan kerajaan.

Kuarantin Wajib

Semalam, seramai 755 individu tiba di semua pintu masuk antarabangsa dan semuanya telah dikuarantin di stesen-stesen kuarantin di seluruh negara.

Secara kumulatifnya, sejak 24 Julai 2020, seramai 210,668 individu telah pulang ke tanah air dan kesemua ditempatkan di 74 hotel dan 10 Institut Latihan Awam (ILA) serta Institut Pengajian Swasta di seluruh negara.

Daripada jumlah itu, seramai 8,384 individu telah dikuarantin dan 200,146 orang dibenarkan pulang manakala 2,138 lagi dibawa ke hospital.

Barang Keperluan Asas

Pemantauan serta pemeriksaan oleh anggota Penguatkuasa Kementerian Perdagangan Dalam Negeri dan Hal Ehwal Pengguna (KPDNHEP) di peringkat peruncit dan pemborong mendapati bekalan makanan adalah stabil dan mencukupi.

Semalam, KPDNHEP telah membuat 698 pemantauan harian ke atas 10 jenis bekalan barangan terdiri daripada peruncit (523), pemborong (144) dan pengilang (31).

KPDNHEP juga telah melakukan 1,655 pemeriksaan khas pematuhan SOP dan daripada jumlah itu, 1,619 premis patuh SOP, 35 premis diberi nasihat manakala satu (1) premis dikompaun kerana tidak patuh SOP.

Saringan Wajib Pekerja Warga Asing

Semalam, seramai 107 warga asing telah menjalani ujian saringan dan satu (1) kes positif COVID-19 dilaporkan.

Secara kumulatifnya, Kementerian Sumber Manusia (KSM) memaklumkan seramai 697,199 pekerja warga asing telah menjalani ujian saringan COVID-19 yang melibatkan 36,048 majikan.

Daripada jumlah itu, seramai 10,319 orang telah disahkan positif COVID-19 manakala 686,886 lagi adalah negatif. Sehingga kini, sebanyak 1,544 buah klinik telah terlibat dengan program saringan ini.

Seperti yang telah diumumkan, ujian saringan COVID-19 adalah diwajibkan kepada semua pekerja warga asing mulai 1 Februari 2021.

YB DATO' SERI ISMAIL SABRI YAAKOB
MENTERI KANAN PERTAHANAN